

EBEDEYON ISADAIDBON ISTE

*Abi yacnoshon ambi uaidon Icbombo
Esuquidistu nendac*

¹ Ëndenquimboshë Nuquin Papan ëmbi chiacpadomboen chuibanta cac adomboembidi abëd icquido tsusedpabon chuibanoapampic. Abentsëc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bëda budmiac aidën chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic. ² Nëbi tsyuecquio Nuquin Papan chiacpadomboen abipadquiocquidëmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubëdta uashun aidënquiocquidtedi aton Papabëdtan uabanampidquio aton Madombo nec. ³ Aidi, aton Papa bëdaidquio yampidpadquidquiobidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubëd aidënquiocquidtedi adquioaudi iquec. Aidi aton Papan chiaid niaquesambo yec matses icsaid bedshunash abided cuidadec unësash, Ëmbi bëdambocquid icmebanaido matses nendac, quequin tantiashic abuc nidoash Nuquin Papabëd tabadoapanëdash aidquiobi. ⁴ Ad icnuc ambi abi

yacnoshon uaido abipadquid nibëdec. Aidon con Icbombo caidquio nec. ⁵ ¿Ambi abi yacnoshon uaid mayan bëda isec:

“Con mado mibi nec.

Ëbi min papa nendac, quepecta Nuquin Papa iquec? Padenquio.

Adecbidi:

¿Nëidën Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

⁶ Abëd Abiambo Yampidi nidaidën tabadash choasho isun Nuquin Papan ismequin:

“Nëid con Madombo Abentsëqui nec. Aidquio tantiec con Icbo nec, quec cuishon quec, ambi naid chiec cuëdën, cac aden ambi abi yacnoshon uaido mayan bëdabo chuibanec cuëdëncuededendac.”

⁷ Ambi abi yacnoshon uaido mayan bëdabo naden Nuquin Papan chiec:

“Ëmbi chiacpadequi cunquequid yanec.

Adecbidi, ëmbi chiacpadequi cuëte nëdëñquedote iquendac.”

⁸ Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ënenquiocquin ëbëdtan Chuiquid Abentsëcquo mibi iquendac.

Adecbidi namequid bëdaidquio mibi iquendac.

⁹ Ëbipadquid iquec bëdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ëbi yacpadquidquo Icbo
Abentsëcquiobi mibi nec. Mibëd icquido
adquid nibëdec.

Mibi abentsëqui adquidquo iquec. Adquid iquec,
Bëdambo iquebi, quec mibi cuishon quen-
dac.”

¹⁰ Adembidi Nuquin Papan naden aton Mado
chuioaic,
“Tauamboen nidaid abubëdta uashun
aidënquiocquidtedi mimbi uabampampic.

Aidtedishun icbombo mibi nec.

¹¹⁻¹² Aidtedi ënëdendac.

Mibien nibëdantiapimbo yec abi tabadendac.

Aidtedi dashcute shënibudaid niacbimboen chuca
uaindac.

Mibien Abiambo Yampid yec abi ënëdesa mibi
iqwendac.

¹³ Nëbi cainec ëbëdquo tabadec cho.

Mibi chieshënqidtedi nibëdquo icmenun nabono.
Chiata,”

quequin Nuquin Papan chiampic. ¿Ambi abi
yacnoshon uaido mayan bëda aden chuiampidta
nepadic? Padenquo. Esuquidistu aden
chuiampic. ¹⁴ Ambi abi yacnoshon uaido mayan
bëdabo Nuquin Papan, Ëbëd tabadtequidombo
nashunta, caido nec.

2

*Ambi chiaid tantiesa icchitomane, queshun tan-
tiadonequiotha caid*

¹ Adec abitedishun Icbombo aton Mado icnuc
ambi chiaid chieshënchitomane queshun tanti-
adonequiec tabadnuna. ² Ëndenquimboshë ambi,
Naden nata, quequin chiaid ambi abi yacnoshon

uaido mayan bëdabo chuimiacpadomboenuidi naisa icsho isun Nuquin Papan cuidpampic. ³ Aden èndenquimboshë ambi chiaid chieshënqid ambi cuidpampicpaden ³ nëbi icquidtsen ambi chiaid chieshënsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanëdash. Adoac, Ëbi yacno Yuedanquid nebi, quequin aton Madonquio Esusëmba chiambic adomboembidi abi tantiaquidontsen chuoapondashi. Aden Esusën chiaid tantiaquidon chuibanebien, ⁴ Ëmbi chiaidquio chuibanoapec, quequin ismenuequin aton Mayanën Nuquin Papabëd icquidën tantiamebanacpadomboen nadatiambocquin utsi-utsien bëdamebanquinc, mayan icfa dapuduedmequinc, unësaid uincuemequinc caquin adquidën-adquidënquien nabededpanëdash.

Matses icnu quiash Esuquidistu matsespanëdash

⁵ Adembidi chuinu. Tantiata. Abi yacno Esuquidistu tantiaquido choash tabadsho isun, Nëido ëbi yacnoshon èmbi uaido mayan bëdabo mibi chuiquid nec, quenquio Nuquin Papa iquendac. ⁶ Èndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Ëbi chui, Papa. ¿Atotsieshun mat-ses mimbi uaid pistsëcquio icsho mimbi comapenen tantiatequid aido icpec? Papa. Adembidi, ¿Atotsieshun Adanën tsyuecquido mimbi nashumpe? Papa.

7 Nëbi chuitan mimbi cac mibi yacnoshon uaid mayan bëdan adomboembidi chuiac matsesën nabaneç.

Yuecquiocshon mibipadquid matses mimbi icmendac.

8 Adquid icmeshun mimbi uaidtedishun icbombo-bidi aid mimbi icmendac,”

quequin abimbo chiampid nec. Nëbi abitedishun icbo matses mimbi icmiambio iquec. **9** Utsien Nuquin Papapadquidquio yequi matsesun Nuquin Papan tantiamiacpaden ambi abi yacnoshon uaido mayan bëdabon chiac nabamboedi nëbi aton Papabëd tsadec abitedishun Icbombo yanac. Aidi Nuquin Papan chiacpadomboen nanuec nidaidëñshun tishac matsesash matses tantiec matses icsaid bedshunash abided cuidadec unësash abitedishun Icbombo yampanëdash.

10 Nuquin Papa abitedi uaquidquio icnuc ambi tantiacpadec iquec. Adquid icquïn ambi, Matses icsaisa icmeshun con bacuë icmembí, quequin tantiacpaden ëbi yacno abi tantiaquid yuedquid con Madombo iquendac, quequin ambi chiampic-padquiequi aton Mado matsespanëdash. Aidi mat-ses yec natiamianquiequi icsaisa yec unësash uincuenash bëyucanec abi yacno dectatonepanëdash ma Nuquin Papan, Matses con bacuë icmembí, quequin tantiaido ëbi tsibanec dectatonepanu quiash. **11** Matses bëdambo icmequid Esuquidistun Papa ambi bëdambo icmebantequidon Papabidi nendac. Aton Papa Abentsëqui icnuc Esuquidistu Nuquin Papa yacno choash, Con utsibo nec, quependac **12** aton Papa chieç:

“Mibi chuiquin con utsibo tantiamenu, Papa.

Aidobëd tabadquimbi mibi chuinu. Tantia, Papa,
quependac.”

13 Adembidi chuiãoaic:

“Mibi tantiaquin mimbi chiampicpadomboen na-
banash choaobi, Papa.

Ëbi tsibantequid mimbi bëdaidquio icmiaidquio
bëec choaobi, quequin mibi chiendambi,
Papa,”

quequin matsesabi yec abuc tabadquin
Esuquidistun chuiampic.

14 Matses namibëd intacchoquid yec unëstequid
icsho mënchicquid icnu quiash Esuquidistu
matsesash unëstequid yampanëdash. Ma matses
mayan icsan dacuëdmequin dëcatemëntiapimbo
yampanu quiash matsesash unëstequid
yampanëdash **15** ma mayan icsan ambi
dacuëdmiaido ambi yuaido icboedi matses ëmbi
mënchictequid ma icpanuna. **16** Ëmbi uaido mayan
bëdabo unëstequid icsho mënchicnu, quenquio
yec matsesash Esuquidistu unëspanëdash.
Abadauanën tsyuecquido mënchicnu, quiash
matsespanëdash. **17** Aden ambi chiacpaden
nanuec matsespadquid yampanëdash. Adeç
matsesash matses nënacpadquiec nëmpanëdash.
Abi bundoacpadquiec bundopanëdash. Abi
natiacpadquiec natiatequid icpanëdash. Mayan
icsan icsamenuequin tanaidbidi icpanëdash.
Matses yanash icsaisa yec matses icsaid
bedshunash abided cuidadec unëspandëdash
matses Nuquin Papan bëdamboen istequid
icmenuec. Adecbidi, Matses icsaisa yanabi yec
chuibanec Nuquin Papabëd onquetiapimbo
iquec, quec matses chuibanec Nuquin Papabëd

aidi onquec. ¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanëdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ëbi dayacquio icmec cho, cac badedquio choquin chieshesa nuqui icmendac.

3

Abi yacno yuedanquidquio icquin Moises dëniacquid Esuquidistu

¹ Adeç matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ëbi chuibeneta, cashumbic adembidi ambi matses chuibanec ëbëd onqueqid dapa icoata caid Esuquidistu nec, quequin aidquio tanti-aquionona. ² Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesën chuided-chuidedampicpaden Esuquidistun adomboembidi chuibampanëdash.

³ Aidi Abiambo Yampid yec, Ëbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. ⁴ Nëidted con shubun ëbëdi tabadendac, quequid shubu icbo nec. Aden Nuquin Papan chiacpadomboen aton shubun icquido bëdambocquid icmequid Esuquidistu nec. ⁵ Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. ⁶ Esuquidistu

Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanëdash. Aidën shubun icquid nebi, queshun chieshenquiocquin cainquidquio aton shubun icquidquio nuqui nendac.

Chieshenda

⁷ Aton shubun tabadnuequid naden Nuquin Papan Mayanën ambi chiaid mibi bëdamboen tantiamenuen chieque. Tantiata:

“Nëbimbobi Nuquin Papan chiaid chieshënenquio yec tabadta.

⁸ Equipito yacnoësh cuëte nibëdacno capuquin tsusedpabon,

¿Nuquibëdida Nuquin Papa iqueque? Tantiabono, queshun ambi chiaid chieshëmpampicpaden chieshënenda.

⁹ Cuëte nibëdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan ëbi cuid-peba?

Isbono, quiacpadquiec tsusedpabo icsamboec tabadpampic.

¹⁰ Adec tabadsho isash nëishpondabi.

Ëmbi chiaid chieshënec ambibi tantiacpadequi ic-sadenepampic.

¹¹ Adquid icsho isun chushcain: Ëmbi abitedi uabanquin nainash

ëbi tabadacno aidtedi puduedmenquio iquembi,
 quequin chiacpadomboen naindambi.
 Abimbo caimbi,”
 quequin Nuquin Papan isadaidbo chiampid nec.

¹² Abiambo Yampid Nuquin Papa abi
 iuec, quequin tantiash cuëshëdchitomane
 queshun tantiadonequiota. ¹³ Nuquin Papan
 chiacpadquiec tabadnuna, quec badiadquidën-
 badiadquidënquiec chuinanec onqueta ma adoac
 icsamianquidën chiac Nuquin Papan chiaid
 chieshënenquiocpanuna. ¹⁴ Esusbëd icquid nebi,
 quiondacpaden tantiadenequin caimbudec aton
 matses yec Esus yacno nidanetequidquio mibi
 nendac. ¹⁵ Nuquin Papan chiampid utsitsen
 chuiniu. Tantia:

“Nëbimbobi Nuquin Papan chiaid tantesa uampic-
 paden tantesa uainda.”

¹⁶ ¿Tsuntsin Nuquin Papan chiaid tantiashun
 chieshëmpampic? ¿Equipito yacnoshon bëyucanquin
 Moisesën buanaido Nuquin Papan chiaid
 tantiash chieshquito yanenquioda icpampic?
¹⁷ ¿Tsutsibidi seta 40ted matamec chiesho isash
 Nuquin Papa aidtedbidi seta matamec nëishted-
 nëishtedpampic? Adoac ¿Cuëte nibëdacnoësh
 icsaquidtedi unësbudnenquioda icpampic?
¹⁸ ¿Abitedi uabanquin nainash ëbi tabadacno
 puduedmenquio iquembi, quequin tsutsi Nuquin
 Papan chuiampic? ¿Ambi chiaid chieshënqid
 Nuquin Papan chienquioda icpampic? ¹⁹ Ai,
 tsusedpabon Nuquin Papan chiaid tantiash,
 Bëdambo iqueque. Adonona, queboedombi,
 Nuqui nabocpadomboen nanuna, quequin ambi

chiaid chieshënsho Nuquin Papan abi yacno puduedmetiapimbo icpampic.

4

Ëbi yacno puduedash ëbëd tabadtequid quiaid

¹ Ëbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuiuoaique. Abi yacno abëdi ictiapimbo icchitomane quequin Esuquidistu tantiadonequionona. ² Ëbi yacno puduedash tabadtequid iquendac, quequin èndenquimboshë Nuquin Papan nuquin tsusedpabo chiampicpadomboen nëbi nuqui chuiuoaic. Aden èndenquimbo chuisho tantiash, Nuquin Papan chiaid abimbo iquec, quiash tantienquio yanash, Aid cainu, quetiapimbo tsusedpabo utsi-utsiec yampampic. ³ Ambi chiaid tantiaquidomboen nëbi aidbëdi tabadec.

“Ènden yampidon tantienquiocsho isash, Abitedi uabanquin nainash ëbi tabadacno chotiapimbo aido iquendac,”

quequin chushcaquin Nuquin Papan aden chuijpampic. Tauamboec ambi tantiacpadomboen abitedi uabanquin nainash Nuquin Papa quenenash tabadpampic. ⁴ Abi tabadaid chuiquin Nuquin Papan nadan dada uamiampique. Tantia: “Seistedec ushquin abitedi uabanash badiad utsin ènash tabadpobi.” ⁵ Ashumbic nadentsen dada uamiampic:

“Ëbi ènash tabadacno ëmbi chiaid chieshënquido chotiapimbo iquendac,” quequin chuijpampic.

6 Aden chuimiac ëndenquimboshë ambi chiaid tantiesa icquin niac-niacquec Nuquin Papabëd tabadtiapimbo icpampid icnubi ambi chiacpadomboen naquin caimpampidobëd nëbi nidaid utsi-utsiec icquido Nuquin Papabëd tabadtequid nendac. **7** Ambi tantiacpadëن Nuquin Papan chuimiacpaden Dabid padon:

“Icsachitomane queshun Nuquin Papan chiaid tantiaquiota,”

quequin dada uapampic. **8** Chuiquid dapa Dabid tishambocnoc Equipito yacnoësh nidaid Canan yacno abi chuiquid dapa Osuebëd isadaidbo cho-chopampic. Capuec ënëdash nidaid Canan yacno cho-choash isadaidbo ënëdenquio yec tabadte icnuc, Ëbi yacno ënëdenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio ictsenampic. **9** Aden Dabid pado chuimiaid tantiash abi tantiadonequidombo Nuquin Papabëd tabadquido nendac. **10** Aden uabanquin nainash Nuquin Papa tabadcpadec ambi bëdambo icmenuequin tantiactedi nabanquin nainash aidbëdi tabadendac. **11** Nuquin Papabëd tabadnuequin ambi tantiacpadec icnuen nainu, queshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane queshun adonona.

12 Nuquin Papan chiaid ambia chuiampidquio abi iquec. Nadatiambocquin tantiamete ambi chiaid nec. Shocosh siante abiuc daëdi cuënumbocquidën siaid uquëduc sënquin nami

icsaid isendac. Adomboembidi Nuquin Papan chiaid chiac papuduedquin matsesën tantiaidtedi uquédud sénaid isacbimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa néid icnubi mimbi tantiaid utsi bëdambo iquec. Adecbidi, mibi bunaid icsa néid icnubi mibi bunaid utsi bëdambo iquec, quequin tantiamebanshun mimbi tantiaid icsa mibi bunaid icsabëdtabi énta, quequin Nuquin Papan chiaidënquo mibi tantiamendac. ¹³ Abitedi isquidquo Nuquin Papa nec. Adquid icquin matses ompodtiapimbocnoc isendac. Adembidi, Ëmbi chiacpadomboenda matsesën nabanoshe. Tantianu, queshun, abi yacno tabadnuequin cainquido bëisquioquin ambi nabanaidtedi chuimendac.

Matses chuibanec Nuquin Papabëd onquequid dapa Esuquidistu

¹⁴ Ade Nuquin Papa abitedi isquidquo icnubi icsambocquid icquin ambembi matsesën aid chuitiapimbocsho isun abi tantiaquido chuibanec Nuquin Papabëd onquequid dapa énden abi yacno dectatonëdaid Esuquidistu nec. Aidi Nuquin Papan Madombo nec, quequin tantiesa yanchitomane queshun aidquio tantiaquionona.

¹⁵ Matses chuibanec Nuquin Papabëd onquequid dapa matses yequi natiamiacmaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquo Esuquidistun

icpanëdash. ¹⁶ Adquid nuqui chuibanec Nuquin Papabëd onqueqid dapa iquec, quequin tantiec dacuëdenquio yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquio icmendac.

5

¹ Ëndenquimbo Nuquin Papan, Min matses chuibanec ëbëd onqueqid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, queshun nidaidën capuqid yua cuesunedenequin tauidenepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun tauidenepampic. ² Aton matses chuibanec Nuquin Papabëd onqueqid dapan aton matses icsasho isun, Con matsesbëdi icsaquid nebi, quequin ³ nidaidën capuqid yua utsi-utsien cuesunedeneampic.

⁴ Aidi, Con matses chuibanec Nuquin Papabëd onqueqid dapa icnu, quenquio icpampic. Nuquin Papambi, Min matses chuibanec ëbëd onqueqid dapa icta, caid nepampic. Min matses chuibanec ëbëd onqueqid dapa icta, Nuquin Papan abia caid Adon cuëmëdquid icpampic.

Aidi unësan abi tsibanquid-abi tsibanquidquién Nuquin Papan, Min matses chuibanec ébëd onquequid dapa icta, caid icpampic. ⁵ Adembidi Nuquin Papan, Matses chuibanec ébëd onquequid dapa icta, caid Esuquidistu iquec. Ébibi adquid icnu, quenquio Esuquidistu icpanëdash. Aton Papambien:

“Mibi con Madombo neque.

Con shubun icquido mimbi icmiaido chuibanec ébëd onquequid dapa icta,”

capampic aton Papan Esuquidistu chuiquin. Adembidi Esuquidistu chuioaquin aton Papanquio:

“Matsesash icsaisa yec min utsibo icsaid bedshunash cuidadec unësash uincuenash matses chuibanec ébëd onquequid dapa icta,”

capampic. ⁶ Ambi chiaid utsi nad icpampic:

“Matses chuibanec ébëd onquequid dapa Medquisedec yampidpadquid mibi nendac.

Adquid yec énëdenquioctequidquio mibi nendac.”

⁷ Adec, Con Pan chiampicpadquid icnu, quiash matsesacsho unës uaquin möyante nendabi, quequin tantiec shubiec nadpanëdash. Matses icsaid bedshunash cuidadquid ébi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiacpadomboen natiadquio iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquio icmepanëdash. ⁸ Nuquin Papan Madombo iquequi matsesacsho möyanac Nuquin Papan chiacpadomboen tantiabempanëdash. ⁹ Aden

tantiabenash matses icsaid bedshunash abided cuidadash Nuquin Papa yacno Yuedanquid yanquiopanëdash. ¹⁰ Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuijmpic.

Nuquin Papan chiaid ènden tantiaboedi tantiesa yanenda

¹¹ Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidtedi chuitiadquiocquin mibi eme uacsho ¿mitsipadomboentsimbi chuibanquin mibi tantiamepe? ¹² Mibia utsin tantiamiaid icquin ènden tantiabempatecnëdan mibitedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatiapimbo mimbi icpec. ¹³ Shuma chishquid bacuëmpí, Bëdamboen nata, quequin chiaid tantiesa nec. ¹⁴ Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabane. Adomboembidi Nuquin Papan chiaid tantiamiac tantiabenquidquo yanshun adomboen nabandene. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, queshun nainquio iquendac.

6

¹ Aden Esus chuiquin abia tantiamiaid

bëdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tantia. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquo icta. ² Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unësash uinciente iquec, quequin tantiaquidquo icta. Adembidi, Abi tantiesa cuidtequid iquendac, quequin tantiec bëdamboec tabadteneta. ³ Aidtedi mimbi tantioc. Aidtedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴ Aden Esuquidistu tantiasho isun aton Mayan Nuquin Papan meniaid icboedi ⁵ Nuquin Papan chiacpadomboen nadatiambocquin nabamboed, ⁶ Esus matsesquio yec icsamboquid nepanëdash, quiash, Esus cuesten dectan, quequidbimboecquid icsho Nuquin Papan aid isendac. Aidën oncain Esus mamëñshunec. Aden Esus tantienquo yanacsho bëdamboen tantiamenuen chuiquin, Icsaobique. Ëbi icsaid ënu, cametiapimbo Nuquin Papan iquendac.

⁷ Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaido iquendac. ⁸ Echobëd cana shëta chedo ëshë idash dadpen yanushe queshun nëdëncatequid nendac. Adecbidi icsamboen chiaid tantiaquid

uquë nësiatequid nendac.

⁹ Aden mibi chuiquimbi, Nuquin Papan nësiatemaid mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. ¹⁰ Adoac abi tantiaquid utsibo tantiaquin mimbi nashundeniaid Nuquin Papan bëpiscudenquiocquin tantiec. ¹¹ Adecbidi utsibobëd tantiananec mibi bëdamboec tabadpushun. Adec tabadash abi yacno puduedsho, Bëdamboen mimbi nabancoc, Nuquin Papan mibi caindac. ¹² Aden nabanech chieshenquiocquin Nuquin Papan chiaid tantiaquoquin tsusedpabomba caimbudec unësash Nuquin Papa yacno puduedampicpadec Esuquidistu tantiaquoquin ënenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³ Ëndenquimboshë Abadauan bëdamboec tabadsho isun ambia tantiaquidquo abi yampidquibidi icquin, Ëmbibi tantiacpadomboen nanuna. Abimbo caimbi, quequin Nuquin Papan naden chuiampic: ¹⁴ “Mimbi tishmiaidën tsyuecquido dadpen iquendac, queshun ëmbi chiacpadomboen nabankuin mibi, Bëdambo iquebi, camembi,” quequin Nuquin Papan Abadauan chuiampic. ¹⁵ Aden chuisho tantiashun caimbudquin tishtiapimbocquidëmbi Abadauanëñ chidon aton mado tishpampic.

16 Abimbo caimbi, quequin abitedi tantiaquidënquo Nuquin Papan chiac utsi, Muenec, quetiapimbo iquendac. **17** Adembidi, Ëbi yacno tabadte iquendac, quequin ènden yampidën Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanëdash. **18** Adec Nuquin Papa muatiapimbo icquin ambi chiacpadomboen naquidquo Nuquin Papa nec. Adembidi, Ëbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ëbi puduedmequid Esus iquec, quequin caimbudquid nuqui nendac. **19** Aden caimbudquin, Ènden Nuquin Papa yacno puduedshun ëbi yuedquid iquec, quequin nuqui tantiec. **20** Nuqui caintequid Esuquidistu ènden Nuquin Papa yacno bëyucanec abi tantiaquido chuibanec Nuquin Papabëd onquenuec puduedash Medquisedecpadquid yampanëdash.

7

*Medquisedec matses chuibanec Nuquin
Papabëd onqueqid dapa*

1 Medquisedec nad icpampic, Sadén yacnocquido chuiqid dapa nepampic. Ambi Sadén Cain cuënaidi yuecshun Edusaden Cain cuënoapampic. Aidbidi Nuquin Papan, Matses chuibanec ëbëd onqueqid dapa icta, caid nepampic. Adquid icquin aton mado bedboedo tsibanshun cue-suniash Abadauan chosho bëquedshun, Nuquin Papan bëdamboen isaidquo mibi nec, quequin

Medquisedequën Abadauan chuiampic. ² Adsho tantiash, Nuquin Papan con mado bedmiaid nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmequid icsho Medquisedec cuëmpampic. Adembidi, Saden yacnocquido chuiquid dapa icquin bëdamboen tabadmequid icsho Medquisedec cuëmpampic. ³ Aidi aton papabëd aton tita nibëdquid nec. Nëid ushën tishaid nebi, quetiapimbo aid iquec. Abi unëste ushë adquibidi iquec. Nuquin Papan Madombo aben icquidpadquid Medquisedec nec. Mat-ses chuibanec Nuquin Papabëd onquequid dapa yanash adquiduidquio iquec. Utsi yantiapimbo iquec.

⁴ Aidi ëbi chuibanec Nuquin Papabëd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic. ⁵ Yuecquiocshon Nuquin Papan: Min matses chuibanec ëbëd onquequid dapa icta, caid mibi icquin min utsibon aton na musuaid bedshunta, quequin Debi chuiampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton utsibonquio aton na musuaid bedquid icpampic. ⁶ Medquisedequëmbien tsyuecquidpenquio icquimbi Debin tsusedpa Abadauanën na musuaid bedshun, Nuquin Papan bëdamboen isaidquio mibi nec, quequin Abadauan chuiampic. ⁷ Bëdambo mibi icmenu, quequin Nuquin Papan chiaid ambia

chuiquid Medquisedec icpampic. ⁸ Yuecshun ambia chuibanec Nuquin Papabëd onquequid dapapadquiocquin aton matsesën na musuaid bedquid Debi unëspampic. Adecbidi aton tsyuecquido unëspampic. Padnuen Abadauanën na musuaid bedquid Medquisedec unësesa yampampic. ⁹ Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menenu, queshun Medquisedec menepampic. ¹⁰ Aton tsyuecquid tishambocnobi Debin buchisio Abadauan caidën Medquisedec bëquedtuidshun menepampic.

Medquisedec yampidpadquid Esuquidistu

¹¹ Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bëdambocquid icmian Medquisedecpadquid choenquio ictsempampic. ¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabëd onquequid dapa yampanëdash. Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. ¹³ Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. ¹⁴ Aton tita Uda cuëmëdquidën tsyuecquid icnuc matsesash Udan tsyuecquid Nuquin Icbo Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi

tantiaiduidi chiec Moises, Udan tsyuecquid Debipadquid nec, quenquio icpampic.
15 Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. **16** Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquio Esuquidistu yampanëdash. Matsesash icsaisa yec unësash uincuempanëdash. Adec uincuenquid yec unëstiapimbo iquec matses chuibanec Nuquin Papabëd onquequid dapa yanquiopanëdash. **17** Aid chuiquin Nuquin Papan nadopampic:

“Ënenquiocquin matses chuibanec Nuquin Papabëd onquequid dapa
 Medquisedecpadquid mibi nendac,”
 quequin chuirampic.

18 Aden chiambien matses chuibanec Nuquin Papabëd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiacpadomboen nadenequin aton matses icsaisa icmetiapimbo icpampic. **19** Adoaid Nuquin Papa yacno puduedtemaid matses icpampic. Nëbien bëyucanec puduedash Nuquin Papa yacno abi tantiaquido chuibanec Nuquin Papabëd onquec tabadec, quequin abi yacno yuedte caimbudec nidaidën Nuquin Papabëd tabadachimboec nuqui tabadec.

20 Abimbo caimbi. ¿Matses chuibanec Nuquin Papabëd onquenu quec puduedquid

ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuirampic. Aden Debi chienquiocquin aton madouidtsëqui chuirampic. Debi unësan aton tsyuecquid aton matses chuibane Nuquin Papabëd onquequid dapa icpampic. ²¹ Nëbi Nuquin Papan aton Madombo caic:

“Icbo icquin matses chuibane ëbi chiec puduedoata, mado, quequin abimbo chiembi.

Aden chuiquin chuca uainquio iquembi.

Ëndenquio yampid yec ëbi yacno utsi puduedmenush ëbi chiec puduedash ënëdenquio yec tabadquid mibi nec, quequin abimbo chiembi,”

quequin chiampicpadec aton Madombo adquid yanquiopanëdash. ²² Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibëd aton tsyuecquid adecbidi adquid ictiapimbo iquec.

²³ Debi adecbidi aton tsyuecquido unëstequidquio iquec yuen chuibane Nuquin Papabëd onquequid dapa ictiapimbo iquec.

²⁴ Esusien abi yacno chuibane bëyucanec puduedash ënëdenquio yec Nuquin Papabëd onquequid dapa nendac. Adquid utsi nibëdendac.

²⁵ Adeq Nuquin Papa yacno ënëdenquio yec tabadquin abi tantiaquido chuibane aton Papabëd onquedenenuc abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶ Adeq aidi abi yacno yuedanquid, icsa nibëdquid, icsa uatiapimbocquid, icsa nibëdquiec

yacno tabadquid yec abi tantiaquido chuibanec Nuquin Papabëd onquequid dapa yampanëdash.

27 Debipadquidpenquio yec, Matses icsaquid neque. Nuquin Papan chiampicpaden baded-badedquien nidaidën capuquid yua cuesunenu, quenquio icpanëdash Esuquidistu. Matses icsaid bedshunash abided unëspanëdash padpidec unësenquio icnush. **28** Debibëdi abipadquid icsaquid icsho, Min matses chuibanec Nuquin Papabëd onquequid dapa aid icmeta, Nuquin Papan cac Moisesën Debi adquid icmepampic. Nëbi Medquisedecpadquidien Bëdambocquid icpampid ëbëd onquec ëbi yacno Puduedquid Abentsëcquiobi mibi iquendac. Abimbo caimbi, quequin Nuquin Papan chiampidquio Esuquidistu nendac.

8

Matses chuibanec Nuquin Papabëd onquec abi yacno puduedquid

1-2 Adec Esuquidistu abi tantiaquido chuibanec Nuquin Papabëd onquequid dapa Nuquin Papa tabadacnombobi puduedoash aton Papa Abiambo Yampidbëdquio onquec tabadec. Debipadquidoen aton matses chuibanec nidaidënsun Nuquin Papa tabadte shubu uashunaidën puduedash auëshquio Nuquin Papabëd onquepanëdash.

3 Con matsesbëdi icsaposh icmanendac, queshun aid shubun puduednu queshun umanucshun nidaidën capuquid yua aidon cuesunepampic. Adembidi Nuquin Papa

tantiaquin menenuequin aton matsesën bë-bëaid bedshun nadenepampic. Esusien Nuquin Papa yacno puduedoanush, Ëbi icsaid ëbibi cuidadnu, quenquio yec matses icsaid bedshunash abided cuidadpanëdash. ⁴ Aidi unësabi yec nidaidëen tabadnuc Moisesën chiacpadec Debipadquid matses chuibanec Nuquin Papa chiec onquequid icpanëdash. Adquid icnuc nidaidënuësh matses chuibanec Nuquin Papabëd onquequid dapa ictiapimbo Esuquidistu icpanëdash. ⁵ Nidaidëen tabadquin Nuquin Papa tabadte shubu uashunaidëen puduedshun Debipadquidëen nashumpampic. Ëndenquimbo Nuquin Papan shubu naden icchitec, quequin abi tabadte shubu uanu, quesho tantiashun: “Macuësh yacnoshon chuibocpadomboen shubu uame,” Nuquin Papan cac Moisesën chuiopampic. Aden chiac Nuquin Papa tabadte shubu uashumpampic. ⁶ Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabëd onquec puduedpanëdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabëd onquec abi yacnombo yuedanquid ictiapimbo icpampic. Esuquidistuen Nuquin Papabëd abia yampid bëyucanec abi yacnombo nidoash abi tantiaquido chuibanec Nuquin Papabëd onquequid yec yuedanquidquo nec.

⁷ Ëndenquimbo nadomboen nata cain chiacpadomboen nadenequi matses icsaisa

yanuc naden nata cain chiaid utsi Nuquin Papan
chienquio ictsempanëdash. ⁸ Nadomboen nata
caqui ambi chiacpadomboen nadenequi matses
icsaisa yantiapimbo icsho isash:

“Yuecash ëmbi chiaid utsi iquendac.

Aid isadaidbo chiendambi. Aidbidi Udan tsyuec-
quido chiendambi.

⁹ Aidën tsusedpabo Equipito yacnoshon
bëyucamequin

ëmbi chiacpadpenquiocnoc chiaid utsi iquendac.

Ëmbi abia naden nata cain chiaid Isadaidbon
chieshënscho

utsibon natiacquin mëyansho isun isadaidbo
mënhicamboccondambi.

¹⁰ Ënden chiaid adquio icnuc:

Nëbi ëbëd tabadmetequid chiaid nendac, quequin
isadaidbo chiembi.

Ëmbi nadomboen nata cain chiaid isadaidbo
pausunendambi tantiate bunquionoc.

Aden tantiamash aton Papa iquendabi.

Adecbidi adquidquio con matses iquendac.

¹¹ Adoaid Nuquin Papa tantiaquid icta, quesa
iquendac.

Abitedi ëbi tantiaquidquio iquendac.

Nëidtedishun ëbi tantiendac:

Nëidic, bacuëbo; nëidic, caniabo; nëidic, tsusiobo
aidtedshun.

¹² Aido icsaidtedi padpiden tantienquio yec
bëpiscudendabi,”

quequin Nuquin Papan chiaid utsi nendac.

¹³ Chiaid utsi nec, quequin ënden abia nadomboen
nata cain chiaid ënëdendac.

9

Nuquin Papa tabadte shubu uashunaidën puduedshun naid

¹ Nuquin Papan ambi, Ëbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ëbi tabadte shubu uashun cacpadomboen abi nidaidën tabadte shubu uashumpampic. ² Nuquin Papa tabadte shubu uashunaid nitsinaid anquënë uaid daëd icpampic. Baded-badedquiec puduedte anquënë uaidën tabote dectantebëd pan sante cueste nacnenaid icpampic. Icsaisa anquënë uaid nec caid niosh. ³ Aid nuntambidi bitsipambocquid daëdcashun dectanëdaid shëcuë anquënë uaid dayun uequid Isaisa Bëdaidquio cain chaniaidquio niosh. ⁴ Aid nuntan bëdambo noadquid sandoshon tauite shocosh icpampic. Ambobidi cueste dabitacaid shocosh icpampic. Aid cuesten saueraid mana caid isadaidbon piampid dayun uaid icpampic. Aid saueraid utsi Adonën cueste tiaid dëyucaid icoapampic. Aid saueraid utsi cuënöte pada uashun Nuquin Papan nadomboen nata quequin dada uaid icpampic. ⁵ Aid saueraid matincash tabadquid ambi abi yacnoshon uaid mayan bëdamboquidbimboecnuc nacnenaid daëd icpampic. Aid daëd Nuquin Papa icsaisambo bëchomauanquiec nac-nacquio ismiantequid icpampic. Nidaidën capuquid cuesuniaidën intac daseccaid isun Nuquin Papan matses cuidenquoctsiash, quequin aidën podon dëcatequin dectanaid diadpampic. Aid Icsaisa Bëdaidquio anquënë uaid sanaidtedi chiombi.

6 Aden shubu uashun aidën icquidtedi nambanash icsaisa anquënë uaidën baded-badedquiec puduedquidon Nuquin Papan Moises chiacpadomboen uesquin nabampampic.

7 Padnuen Isaia Bëdaidquio anquënë uaidën setan-setanquiec matses chuibaneç Nuquin Papabëd onquequid dapa puduedpampic. Baded-badedquiec puduedtemaid aid nec. Ëmbi con matsesbëdtan Nuquin Papan chiaid niacposh icmanendac, quequin nidaidën capuquid yua cuesuneshun intac bedshun buanec nuntan bitsipambocnuc daëdcashun dectanëdaid shëcüë anquënë uaid dayun uequid Icsaisa Bëdaidquio caidën puduedquid abentsëqui nepanëdash. Unësaidën intac buanenquio yec puduedtemaid aid anquënë uaid nec.

8 Adec aid anquënë uaidën puduedquid isadaidbo abentsëqui icnubi Nuquin Papa yacno aton matses puduedte nibëdec, quequin Nuquin Papan Mayanën tantiamete nendac.

9 Adembidi, baded-badedquien nidaidën capuquid yua cuesunedeneç, Ëbibi bëdambocquid nec, quetiapimbo icpampic. Adembidi aton matses icsaisa icmetiapimbo icoapampic.

10 Adecbidi, Nëidic petequid nec. Nëidic actequid nec. Nëid nanush mëpamëdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanën nuqui tantiamec.

Esuquidistu abided unësec intac chiuidaid

11 Ambi chiaid utsi tantiamenuec ambi uacmaid yec abipadquid Esuquidistu Nuquin Papabëd tabadboedi nidaidën budash matsesash icsaisa

ye c matses icsaid bedshunash abided cuidadec unësash Nuquin Papa yacno matses chuibanec aton Papabëd onquequin chuiquid dapa iquec abi yacno Yuedanquid yampanëdash. ¹² Nidaidën capuquid yua cuesuneshun intac bedshun buanec Nuquin Papa yacno puduedenquio Esuquidistu icpanëdash. Aidi abia yampidi icsaisa matses icsaid bedshunash abided cuidadec unësacsho cudan siac aton intac chiuidash Nuquin Papa yacnombo puduedoapanëdash. ¹³ Aidi matses icsaid bedshunash abided cuidadabicnuc nidaidënshun natemaid nasho matses cuëshëdmepanëdash. Adoac utsibëd ictiapimbocsho isun nidaidën capuquid yua cuesuneshun aidëن intacbëdta sisapuc daëd uashun daseccac icsaisa icmiabi yequi aton shubun puduedoapanëdash. ¹⁴ Abia abëd yampid unësesa aton Mayambëd iquec Esuquidistu icsaisambo ye c, Matses icsaid bedshunash ëbided cuidadebi, Papa, quianec unësacsho siac aton intac chiuidacsho isun uincuemiaidën nuqui pauquec ma Nuquin Papan chiacpadomboen nate bunquidquo nuqui icpanueshun. ¹⁵ Adoaidi Nuquin Papan chiaid utsi chuiquin tantiaquid Esuquidistu icpanëdash. Ënden matses yampid icsaidbëdtabi nëbi matses icsaid bedshunash abided cuidadec unëspanëdash ëbi tantiaquido ëbëdi tabadmenu quiash.

¹⁶ Adnubien abi unëste tantiec, Ëbi unësan ëmbi chiacpadomboen con na abitedi menebanta, matses quepec. Aden chuiquid unëso isun ambi chiacpadomboen menebanec. ¹⁷ Aden chuiquid unësabi icnuc ambi chiacpadomboen

utsibon menetiapimbo iquec. Icbon na abi iquec. Aid unësan aidën na icboedi utsin na yanec. ¹⁸ Adembidi ambi nadomboen nata cain chiaid Moises menequin, Ëmbi chiaidtedi nadenesho isun ëmbi chiacnombo mibi buanembi, quequin Nuquin Papan chuipampic. Aden menequin chiac Moisesën nadopampic. ¹⁹ Nuquin Papan chuibocpaden chuishun nidaidën capuquid yua cuesuneshun intac bedshun actebëdta daëd uain cacushun cuëte shubi madquënaid podo mësequiabicquid bedshun sedquid piu uaid potaneshun daëd uaboed nënanshun Nuquin Papan chiaid dada uайдбëdta matses daseccabampampic: ²⁰ “Nëid Nuquin Papan chuibocpaden mimbi natequidquio nec,” quequin ismequin Moisesëmba abitedi daseccabampampic. ²¹ Adoshombic Nuquin Papa tabadte shubu uashunaïdbëdta aidën tabëcaidtedi daseccabampampic. ²² Cuesuniaidën intac daseccatequid nec. Shubu chedo cuesuniaidën intaquën daseccabasicquid mishtemaïd nec. Adecbidi cuesuniaidën intac chiuidenquiocnoc matses icsaid Nuquin Papa bëpiscudenquio iquendac.

²³ Nuquin Papa yacnombo puduednush icsaisa unësendac, quequin ismenuen matses chuibanec Nuquin Papabëd onquec nidaidën capuquid yua cuesuneshun intac bedshun buanec Nuquin Papa nidaidën tabadte shubu uashunaïdën puduedpampic. ²⁴ Esuquidistu matses icsaid bedshunash abided cuidadec unësash nidaidëns hun Nuquin Papa tabadtebimboecnuc shubu uashunaïd yacno puduedenquio

icpanëdash. Abi tabadacnombo abi tantiaquido chuibanec aton Papabëd onquec puduedash abi tabadec. ²⁵ Ambo puduedash, Matses icsaid bedshunash èbided padpidec cuidadnu, quenquio yec tabadec. Nidaidënsun setan-setanquien Nuquin Papa tabadte shubu uashunaïdën puduedquin aton intacpenquio bedshun daseccadenec. ²⁶ Matses icsaid bedshunash abided cuidadec unësambo yec Nuquin Papa yacno puduedoash padpidec nidaid yacno choash unësash abuc Esuquidistu puduedoatsiandac. Adenquio iquec matsesash abi unëste ushënquiobi matses icsaid bedshunash abided cuidadpanëdash nëid nidaid naimëdbudte anoentsëqui icnuc. ²⁷ Nidaidën icquid unëste ushë abentsëc iquec. Unësacsho ambi naid Nuquin Papan chuitequid ushë choendac. ²⁸ Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanù, quenquio yec aidquio padpidemboec choendac. Abi cainquido abi yacno puduedmenuec choaindac.

10

Abided cuidadec unëste abentsëquënquiobi

¹ Setan-setanquien nidaidën capuqid yua cuesuneshun intac bedshun buanec puduedsho isun matses icsaid bedshunash abided unësash abi tantiaquido chuinuec bëyucanec Nuquin Papa yacnoësh yuedanquidquio choec, quequin nuquin tsusedpabon tantiabempampic. Nidaidën capuqid yua cuesuneshun intac buanquid aton matses icsaisa icmetiapimbo yec Nuquin Papa

yacnombo abëd onquetiapimbo icpanëdash.
² Aidënquio daseccaquin matses icsaisa icmiac nidaidën capuquid yua padpiden cuesunenquio ictsempampic. Adecbidi, Icsambocquid nebi, quenquio matses ictsiandac. ³ Aton matses isaisa icmetiapimbocquin setan-setanquien nidaidën capuquid yuaded cuesunepanëdash. ⁴ Adshun yuan intac bedshun daseccaidën matses icsaisa icmetiapimbo iquec.

⁵ Adoaquien Esuquidistu nidaidënshun tishac caniash onquec:

“Nidaidën capuquid yua cuesunenubi ëmbi chiacpadomboen matsesën natiapimbo iquec queshun yua cuesunete bunenquio mibi iquec, Papa.

Matsesën tishtequid mimbi icmiaidquio nebi, Papa.

⁶ Adecbidi nidaidën capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

⁷ Adsho isun mimbi chuiquin dada uamiampic-padomboen naimbi, Papa.”

⁸ Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho issash, Padi. Aid nainquiocquin énta, quequin mimbi matses chuinuc ⁹ mimbi énden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan énden chiaid èmepanëdash. Aden èmian nëbi Nuquin Papan chiaid utsi iquec. ¹⁰ Aden Nuquin Papa bunacpadomboen nash unëstiapimbo

yanshun abi unëste ushënquio abi tantiaquid paucpanëdash.

¹¹ Aden matses icsaid paucpec, quetiapimbocnoc badiadquiën-badiadquidënquien nidaidën capuqid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac. ¹² Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. ¹³ Ambobi tabadquimbi abi chieshënquido ambi chiacpadomboen naquidquio icmete ushë cainec. ¹⁴ Abided unëste ushënquio abi tantiaquid ambi icsaisa icmiaid abëd cuëshëdesambo yampanëdash.

¹⁵ Adembidi Nuquin Papan Mayanën Nuquin Papan chiaid utsi naden chiec:

¹⁶ “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucuden-quiocnoc.

Adembidi ëmbi chiacpadomboen nate bunquidquio icmendambi, quec Icbo.”

¹⁷ Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquio yec bëpiscudendabi, queoaic Icbo,”

quequin chuipanëdash aton Mayanën. ¹⁸ Adeç abi icsaid bëpiscudash nidaidën capuqid yua cuesuneta quenquio Nuquin Papa iquec.

Nuquin Papa yacno puduedte cainta

¹⁹ Adoaidi Esuquidistu unësacsho isun cudan siac aton intac chiuidan, Ambi paucaid nebi,

quec dacuëdenquio yec Nuquin Papan shubu icsaisa caid yacnombo puduedte ushë nuqui cainendac. ²⁰ Matsesash abided cuidadec unësash Nuquin Papa yacno puduedoash tabadquid Esuquidistu nec. ²¹ Ambo nidash Nuquin Papabëd onquequin aton shubun icquido nuqui Esuquidistun chuibani, ²² Ambi paucaid ambi dapanacbimboecquidbidi nebi, quequin tantiaquin abi yacno choacbimboen nidaidënshun Nuquin Papa chiec onquec tabadnuna. ²³ Nuquin Papa ambi chiacpadomboen naquidquio nec, quequin abi tantiaquid yec abi yacno puduedebi, quequin caiimbudnuna. ²⁴ Aden tantiaquin abi tantiaquid utsibobëd tantiananec bëdamboec tabadquin nashununa. ²⁵ Aden nabaneb abi tantiaquid utsibobëd iccuededtiapimbo iquebi, utsi-utsieb quiacpadec adenquio icnuna. Adeb iccuededec, Nuquin Papan chiacpadquieb bëdamboec tabadnuna, quec chuinanta. Niacquid dadpen icsho isash, Matsesën naid chuibankin cuidte ushë badedquio choec, quiash badedbadedquieb chuinanta bëdamboec tabadte bunec.

²⁶ Ëbi icsaid bedshunash abided cuidadec Esuquidistu unëspanëdash, quequin tantiash icsaded-icsadedquid iquec, Adquidquio Esus nec, quetiapimbo iquec. ²⁷ Aid cuidte ushë chonoc nëishun comapenen chushcaindac Nuquin Papan abi chieshëñquido nibëdamequin. ²⁸ Nadomboen nata cain Moisesën chiaid niacsho isun daëdshun chiac niacquid unësmiampic. ²⁹ Nuquin Papan abia naden nata cain chiaid niactenequid adomboen cuidnushe quiash ëbi icsaid bedshunash abided cuidadec Esuquidistu unëspanëdash, queboedi,

Ëmbi tantiabood Nuquin Papan Madopenquio matsesquio ëbipadquid icsacsho cuesuniac, quequin chieshënscho ¿comapenen Nuquin Papan cidenquioda icpadic? Adquid Nuquin Papan Mayanën bëdambocquid icmenu quequin chiaid chieshënqid nec. ³⁰ Nuquin Papan: “Ëmbimbo ëmbi chiaid chieshënqid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedëmbi tantienquio yansho cuidquidquio Nuquin Icbo iquendac. ³¹ Abi cuidantequid dacuëdampambo iquec,” quequin Nuquin Papan chiaid nec.

³² Esuquidistu tantiaquid yanash mibi bëdamboec tabadondacpaden tantiamec chuinaneneta. Esuquidistu tantiabenacchuca icsho chieshëmënqidon möyanaqui, Esuquidistu tantiaquid nebi, quec dayacquio yec bëdamboec mibi tabadteniondac. ³³ Dadpen tabadnubi, ëmbi tantiaid Esus nec, quesho mibi utsibon mamënshunondash. Adembidi aidon natiambocquin möyanac. Adomboembidi Esuquidistu tantiaquid utsi möyansho isun, Aidbëd icquid nebi, quequin ismequin mimbi nashundenepondac. ³⁴ Esuquidistu tantiaquid utsi quënën nauedaid icsyo isash abëdi tabadacbimboec natiamianquiec unësquio yec mibi tabadpondac. Adecbidi mibi chieshënqidën mitsana bedacsho isash Nuquin Papan ëbi menetequid ampetiapimbo iquec, quequin tantiec, Bëdambo iquebi, quec mibi tabadpondac.

³⁵ Adoaidi Nuquin Papan bacuë yec bëdambo iquebi, quiash dacuëdenquio yec bëdamboen nabaneç mibi ënden dayacquio iccondacpadquieç

adquiecbidi tabadteneta. Adquid Nuquin Papa yacno puduedquid nendac. ³⁶ Utsin mëyanaqui Nuquin Papan chiaid chieshenquiocquin tantiadeneta. Adec tabadquin Nuquin Papa bunac padomboen nabanash abi yacno tabadendac.

³⁷ Nuquin Papan chiaid nadquio iquec:
“Chiata. Nëbien mimbi cainaïd mibi mënchictequid choendac.

³⁸ Adsho tantiec ambi pauctequid abi caine nec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. ³⁹ Aid cainuidash utsi tabadnubi abi choate nuqui caine nec. Abi cainesa abi yacno puduedmenquiocquin Nuquin Papan chian anëdëñquequid nësiatequid nendac. Nuquien abi cainquid yec Nuquin Papa yacno puduedtequid nec.

11

Nad iquendac, quequin tantiaquin cainquid

¹ Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacbimboen ëmbi tantiaid nec, quec tabadquidquio nebi.
² Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubëdi nidaid yanquiota,” cashumbic: “Aidëñquiocquidtedi yanquiota,” cac ambi tantiacpadquiequi yampampic,

quequin nuqui tantiec. Aden tantiec ëmbi nëbi isaidtedi nibëdnuc ñmitsipadomboentsi aidtedi icme-bampampiba? quenquio nuqui iquec. Nuquin Papan: "Yanquiota," quequin tantiacpadquiequi abitedimbo yampampic.

⁴ Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bëdamboen isaidquio icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquio abi iquec.

⁵ Adnubien adecbidi abi tantiaquidquio Enoc icsho isun Nuquin Papan buanac unësesa icpampic. Bëdambocquid nec, quequin Nuquin Papan buanacsho nibënquin Enoc istuidambocpampic. ⁶ Abi tantiesa icsho isashien, Ëmbi bëdamboen isaidquio nec, quetiapimbo Nuquin Papa iquec, quequin tantiash aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquio nec.

⁷ Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, queshun, Ëbëd icquid unës uanushe queshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquio aidquio icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac

abi capuacmanombo Abadauan nidpampic.
⁹ Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquio yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. ¹⁰ Nuquin Papa yacno ambi tantiampicpadomboen shubu uaidën tabadendabi, quequin cainec quenenenquio yec nidaidën Abadauan tabadteneampic.

¹¹ Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic.
¹² Adoac Abadauan tsusiobudaidënquio tsyuecquid dadpen uispatedi yampampic. Masitedbidi yanoapampic.

¹³ Aden Nuquin Papan aid nidaid ëbi menendac, quequin tantiec chieshenquio yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquio yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecqido unësbudnepampic.
¹⁴ Nuquin Papa tantiaquid yec Nuquin Papabëd tabadendabi, quiash nidaidën quenenenquio yec aidtedi tabadpampic. ¹⁵ Ëbi tishondacnombo

tantiec unësquio iquebique. Ambo nidoaibi, quiash nidtsempampic. ¹⁶ Adenquio yec, Nuquin Papa yacno tabadendabi, quesho tantiash, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

¹⁷⁻¹⁸ Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Ëmbi chiaid tantiaquidquioda Abadauan neque. Isnu, queshun, Min mado abentsëc Isac caid cuesuneshun ëbi tantiaquin tauita, Nuquin Papan cac Nuquin Papan chiaid niacmane queshun Abadauanën tauinuequin aton mado setsempampic. ¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

²¹ Adnubien adembidi Nuquin Papa tantiaquin tsusio budash unësbudquimbi aton cueste bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

²² Adnubien adembidi Osen Equipito yacno tabadec unësnun, Nuquin Papan nidaid mene-nun nabono, quequin chiaid tantiequi unësebique. Mibitedi: Aid nidaid yacno nidnu, queshun con canite buanta, quequin chuioapampic Osen.

²³ Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquin dacuëdenquiocquin aton mado adopampic.

²⁴ Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshëne, Aidën madopenquio nebi, queoapampic. ²⁵ Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icscho aidobëdtabi ancanquidën méyanaid iquendabi, quianec Moises cuëshëdpampic. ²⁶ Yuecshun Nuquin Papa yacno yuedac bëdambo iquendabi, quequin tantiaquin Equipito yacnocquid shubun yuedshun meniaid isuidec, Natiaic icsatiapimbo iquebi, quiash tabadquin Moisesën caimpampic. ²⁷ Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquio icpec, quenquio yec Nuquin Papa isacbimboec Moises tabadteneppampic. ²⁸ Yuecash Equipito yacno choashun adembidi tantiaquin, Bëyuec tishaid unësmetequid ëmbi ëbi yacnoshon uaid mayan bëda ëmbi budmiaid min shubu data-menuen ëmbi chiacpadomboen nabanta, Nuquin Papan cac ambi chiacpadomboen naquidquio

Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ècnoshcashun nami shuishun pan bidisquesabëdta pepampic. Adoacsho isun Nuquin Papan budmicaidën datampampic.

²⁹ Adnubien adembidi Nuquin Papa tantiec Equipito yacnoësh puduanec nidquin Acte Più potec nidquid podqued nibëdboedi tanunquiocquidën uesadmiaidën isadaidbon potepampic. Aden isadaidbon potenubi abëdtambi potenuec abi chieshëñquido Equipito yacnocquido acte chomiaidën mentoadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiocpec, queshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquio yec chiesho Daban matses utsibo cuesunequimbi.

³² Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen

nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi.

³³ Aido utsin-utsinquien: Abi ancaidobëdtabi ancanquid Nuquin Papa tantiesa nec, queshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquo icpampic. Adquid icsho isun, Pemenu, queshun bëdi nibëdqid deon caid tabadacno buanshun nebupdampic. Adosho isun piantiapimbocnuc Nuquin Papan quiuëccac deonën penquiocpampic. ³⁴ Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquioquid icpampic. Adembidi tantiec utsi-utsiech chështen senuesho isun mënchicquin cuemepampic. Adembidi tantiequi dayacquioctiapimbocboedi dayacquioquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵ Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombededtsëcquien cuesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. ³⁶ Utsi-utsien shocosh bucun mëtaneshun quënën nauedacsho isun mamëñshunquimbi cueshcanten cuestaqui Nuquin Papabëd tabadte tantiec dacuëdenquio yec tsadpampic. ³⁷ Adembidi utsitsen cuënoten

sheshunepampic. Adembidi utsitsen sënten nacsënshunepampic. Adembidi utsitsen nidaidëen capuquid bitsi nacnenaid dasiuidpampic. Aton na nibëdnubi mëyanaqui Nuquin Papa tantiaquidquio yec aidtedi tabadpampic. ³⁸ Nuquin Papa chieshënquid ëbëd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shëcuë uaidëen utsi tabadpampic.

³⁹ Aidtedishun, Ëbi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aidtedi unësbudnepampic. ⁴⁰ Aidtedi icnubi abi icsaid bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

12

Aton bacuë Nuquin Papan dayacmenuequin namiaid

¹ Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabaneç tabadnuna. ² Esuquidistu, abitedishun icbombo abia yampidquio ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isacbimboen adonona. Aidi, Ëbi yacno matses yuednu, quiash aton Papabëd tabadteneboedi

matsesash icsambocquidbimboecnuc cuesten dectanac chieshenquio yec unësacsho uincuen uaid yanash aton Papabëdi Icbombo iquec. Aidquio tantiec isacbimboec nidaidën nuquibi tabadnuna. ³ Abi chieshënidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquio icpanuna.

⁴ Ëbi icsaid padpiden nainquio icnu, queshumbi natiatequid icnuc mimbi ënambo iccoc. ⁵ ¿Con bacuë cain Nuquin Papan mibi dayacquio icmenuequin chiaid bëpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda.

Adecbidi ambi natiamianquiopec camiaid icash chieshenda.

⁶ Ambi matiamianquiopec camiaid dayacquio icmenuequin nametequid con bacuëbo nec,” quequin Nuquin Papan chiampid nec.

⁷ Natiatequid mibi dayacquio icmetequid nendac. ⁸ Ëbi cudasaidquio con mado dayacquio icmenuequin namebanesa nebi, quecta aton papa icpadic? Padenquio. Ambi: Con bacuë nec, caid natiatequid icnuc, Dayacquio icmenu, quequin ancaquin chono uaic. ⁹ Natiatequid icnuc ambi dayacquio icmenu quequin namiaidpenquio yec, ambi, Con bacuë nec, caidpenquio mibi nec. ¹⁰ Ënden dayacquio icmenu quequin mibi ancaquidën mibi tishmequidën chiacpadomboen natiatequid icnuc naquidquio mibi icpondac. Nëbi Nuquin Papan dayacquio icmenu quequin chiacpadomboen natiatequid icnuc naquidquio

icnuna abëdi tabadnuen. **10** Abi tishmequidën ambibi tantiacpaden dayacquio icmenu quequin aton bacuë yuen nametiapimbo iquec unësendac. Padnuen Nuquin Papan abipadquid icsaisa icmenu quequin natiaquionoc nuqui namendac. **11** Adoac nuqui natiaquiec tabadec. Adoaidi yuecash nuqui bëdamboec tabadendac. Adecbidi natiatequid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaquidquio yec natiatequid dacuëdënesa nuqui yanec.

12 Aden tantiec dayacquio ictiapimbocboedi: Abipadquid iquendabi, quiash dayacquio yec tabadta. **13** Adenuidi naic tabadquin utsibo isme ma dayacquio ictiapimbocquin niaquec cuëshëdte bumboedi bëdambo yampanuna.

14 Aden naic tabadec utsibobëd bëdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isnanec chuinanec adquid yanta. Adoesa Icbobëd tabadtiapimbocquid nendac. **15** Nuquin Papan bëdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bëdamboec tabad, quequin chuiban. **16** ¿Ada aton chidopenquio chudquid icpec? Adecbidi, ¿Ada adembidi aton bënëpenquio chudmequid icpec? quequin isnuequin adquid istuidshun Nuquin Papan chiaid chuiquin bëdamboen tabadmeta. Adembidi, Esaupadquid icnushe queshun ¿ada Nuquin Papan bëdamboen tantiaid chieshënquin isuidquid icpec? queshun Nuquin Papan chiaid chuiban. Natia bundoshon

aton utsi Acobon codocaid isun bednun Esaun: Unësnun tsusio icquin con pan bëdamboen tantiad chuisho mimbi tantiata, quequin aton papan bëdambo icmenu quequin chiaid chieshquin Esaun tantienquiocpampic. ¹⁷ Yuecshun, Aton utsi Acobo aton papan chuibanosh, quesho tantiash shubiquin, Mimbi bëdamboen tantiad ëbitsen chui, papa, cac chuitiapimbocquidëmbi, Ènden nibëdquiocnoc uesquin min utsi chiombi, quequin Esau chuiapamic aton papan.

¹⁸ Adembidi, Nuquin Papan nadatiambocquin uabanaid tsusedpabon isampicpadomboen mimbi isabiccoc. Macuësh Sinai caid yacno choshon aidon isbenampid nëid iquec: natia nëdënqedote; utsibic, inchëshacbimboec isadquid; utsibic, cunquequid dapabimboec isadquid; ¹⁹ utsibic, shocosh shoncaten shoncacbimboec onquenuc pabiate paëmboshë icpampic. Adeç onquesho tantiashun, Papa, mibi onquesho tantiac dacuëdampambo iqueque. Mibi chuitequid Moises icme, capampic. ²⁰ Adeç macuësh yacnombo icquin: “Èmbi nadatiambocquin uabanaid ismenubi macuësh yacno anoentsëqui choenda. Adecbidi matses adecbidi nidaidën capuquid. Anoentsëqui choquid cuënoten setequid nendac,” quequin chuiapamic Nuquin Papan. ²¹ Aden Nuquin Papan nadatiambocquin uabansho isash: “Dacuëdampambo iquec, quiash, Dacuëdebi,” queoapampic Moisestsen uëdëquec.

²² Mibien dacuëdenquio yec Macuësh Sion cashumbic Edusaden Chuca Bëdambocquid caid Nuquin Papa ènëdesambo tabadacno choacbimboec mibi tabadec caimbi. Aid nuntan

Nuquin Papan abi yacnoshon ambi uaid mayan bëdabo tambantiapimbo yec dadpenquioshë tabadec. Aido, èmbi nashunaidtedi, Esus tantiaquid chotequid iquec, quiash bëdambo iquebi, quec cuëdëndonec tabadendac. ²³ Abi tantiaquidtedi Nuquin Papan bacuë icbo yacpadquiec aton shubu abentsëquënuëshi Icbobëd onquec ènden mibi taëpoc. Aidi mimbi naid cuidquid ambi chiacpadomboen nadenequid mibi unësesa icsaisabidi icmequid Nuquin Papa nec. Aidbëd ènden tabadacbimboec abëdi onquec mibi taëpoc. ²⁴ Abëd icquin Nuquin Papan ambi ènden chiaid èmeshun ambi nëbi chuiocard, mibi chuibaneç aton Papabëd onquec bëyucanec yuedanquid Esuquidistubëd ènden mibi onquepoc. Mibi icsaid bedshunash abided cuidadec unëso isun cudan siac intac chiuidnëdaid tantiec aidbëdi mibi onquepoc. Abedën nidaidën capuquid yua cuesuniampicpadquidën intac chiuidec unësaid tantiec Icbobëd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ènden chiaid chuiquid tantiate bunesa cuidpampic. ¿Adembidi ambi nëbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic?

²⁶ Ènden Macuësh Sinai yacno Nuquin Papan chiacnoshonquio nidaid ishcumpampic. Nëbien: “Padpidemboen nidaidbëdta abu ènëdmenuen ishcunoaindambi,” quec Nuquin Papa. ²⁷ Aden chuiquin ambi uaidtedi ènëdmenuen padpidemboen ishcunoaindac abi yacno choaidtedi icsaisa

icmiaido yec ënëätiapimbo iccuedednuc.

²⁸ Adoaidi Nuquin Papabëd abi tantiaquido ambi bëdambo icmiaido yec abëd tabadte ëntiapimbocnoc Nuquin Papan nadatiambocquin nabanaid tantiec cuëdëndonec tabadta.
²⁹ Nadatiambocquid Icsaisabidi icquin aidëmbi, Esuquidistu tantiata, quequin nëbi chiaid tantiesa chian anëdënquequid nësecaindac.

13

Nadomboen nata cain chiaid

¹ Esuquidistu tantiaquid yec aid tantiaquidtedi con utsibo nec, quiash tantiananec nashunanta.

² Adembidi Nuquin Papa yacnoësh choquid abi tantiaquido nashuntequid ambi uaido mayan bëdabo chosho yuedampicpaden mimbi isacmaidquo Esus tantiaquid chosho yuedta.

³ Adembidi quënën nauedaid iquec utsi iste buntsiabi, queshun quënën nauedaid istantanta. Adecbidi buntsiabi, queshun menetanmenetanta. Adembidi utsin mëyanaid tantiec shubioata.

⁴ Adec tabadec con chidopenquo chudnu quesa iquec chido utsi isuidquid icta. Adesa icsho Nuquin Papan mibi cuidendac. ⁵ Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bëdambo iquebi, quec tabadta. Adec tabadquid Nuquin Papan ënden dada uamiampid naden chiec:

“Mibëdi iquebi.

Nianenquiocquin mibi dayun uanuna.”

⁶ Adsho tantiash:

“Con Icbombo öbëdi iquendac.

Aidëmbi öbi cudasquin dëcatiac chieshëmënquid
daciüdënenquio iquembi,”

nuqui quendac. ⁷ Adembidi nidaidën icquid mibi
chuiquid dapabo Nuquin Papan chiaid mibi tan-
tiameuequin chuiquido bëshunenda. Aido Esus
tantesa uainquio yec bëdamboec tabadpanëdash.
Aido tanec bëdamboec tabadoata. ⁸ Con Icbombo
Esuquidistu nec. Abia Yampidquio yec nëbi
adquioibidi iquec. Aidi ènëdtiapimbo yec abi
tabadec.

⁹ Adquid Esus icnuc Nuquin Papa
chieshënqidën chuisho tantiesa icta. Aidën
naden chiec, Nëid petequid icnubi nëid utsi
petemaid nec, quequin chiec. Mimbi piaidën
mibi bëdambo icmetiapimbo iquec. Padnuen
matses icsaid bedshunash abided cuidadquidën,
Nuquin Papan madonquio paucaid iquebi,
quequin tantiaquidquio icsho isun Icbobëd
tabadmequin ambi bëdambo icmiaidquio
nendac. ¹⁰ Matses icsaid bedshunash abided
cuidadash uincuenash abi tantiaquidbëd
ènëdenquio yec tabadquid Esuquidistu nec. Adeç
tabadquid Esuquidistu icnubi, Matses icsapash,
queshun nidaidën capuquid yua cuesuneshun
nibëdquiocnoc tauiaidënquio matses Nuquin
Papabëd tabadmetiapimbo iquec. Adembidi
aidënquio nuqui icsaisa icmetiapimbo iquec.

¹¹ Isadaidbo icsapash, queshun nidaidën
capuquid yua cuesuneshun aidën intac bedshun,
Nëid intac Icsaisa Bëdaidquio anquënen uaid
nuntan buanshun daseccacsho isun abi yacno
puduedacbimboecsho Nuquin Papan isadaidbo

isec, queshun nuntan buanshun daseccapampic. Adnubien matses nibëdacno nami buanshun uesquin tauipampic. ¹² Adembidi matses tabadenquio yacno Esus buanshun dectanac unësacsho siac aton intac chididiepanëdash nuqui icsaisa icmenuec. ¹³ Adoaidi abi tantiaquid yec abëd icquid nebi, quequin ènden chiampicpaden nainquiocsho isun isadaidbo Esuquidistu tantiesan cacumiaqui chieshenquio yec tabadta. ¹⁴ Adquid iquec nidaidën yuec tabadesa icquimbiens Edusaden Chuca caid Nuquin Papa ènëdiapimbocquidbëd tabadaid cainquidquio nuqui nendac.

¹⁵ Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna. ¹⁶ Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

¹⁷ Ambia Esus tantiashun chuiquidom chiac paden nabanta. Nuquin Papan, Èbi tantiaquid utsibo isbanta caid icquin aid Nuquin Papan, Icsambo iquec, canushe queshun isted-istedec. Aidon chiacpadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquio.

¹⁸ Chieshenquiocquin èbëd icquid Nuquin Papa chui. Bëdamboen nabane nec tabadteniobi. Adequi tabadebi utsibo: Icsambocquid nec, quetiapimbocnec. ¹⁹ Adembidi èbi tantiaquin Nuquin Papa

chuidoneta. Mimbi adonoc badedquio mibëd iquendabi.

²⁰ Adembidi utsibëd bëdamboen tabadmequid Nuquin Papan aton Mado matsesacsho utsibon unës uashun siacsho isun uincuemiac bëyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanëdash. ²¹ Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ëbi puduedmenuen Nuquin Papan naid nec, quequin ënenquiocquin chuiquid ma icpanuna.

²² Mibi tantiamenuen ëmbi dada uaquin chiaid daëdpactsëcquio icsho bëdamboen isec onquequin tantiadoneta.

²³ Nëbi utsi chiembique. Tantia. Timoteyo quënën nauedboedi nëbi puduemiac aid badedquio nëmbo choan aidbëdi mibi yacno nidendiabi.

²⁴ Mibëd icquid Esus tantiaquid utsibobëdta mibi chuiquidtedi tantiec tsadebi quequin Pabadon dada uaosh, quequin chuita. Adecbidi ébitsen tsadebi quequin chuoata, queoapèc nëuësh Itadia yacno tabadquido.

²⁵ Nuquin Papan bëdambo icmiaid ma mibitedi icpanuna. Padi. Aidtedi dada uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

446da786-5bd1-5ffa-85e2-9eff4052cf8b